

# KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA  
No. 13 Persiaran Perdana, Presint 2,  
62623 Putrajaya

No. Telefon : 03-8882 5562  
No. Fax : 03-8882 5569

## PENGUMUMAN PENENTUAN HARGA MAKSIMUM BARANGAN HARGA TERKAWAL SKIM HARGA MAKSIMUM MUSIM PERAYAAN TAHUN BARU CINA 2020

**PUTRAJAYA, 15 Januari 2020** – YB Datuk Saifuddin Nasution bin Ismail, Menteri Perdagangan Dalam Negeri dan Hal Ehwal Pengguna (KPDNHEP) hari ini mengumumkan **pelaksanaan Skim Harga Maksimum Musim Perayaan (SHMMP) Tahun Baru Cina 2020** adalah dari **20 Januari hingga 2 Februari 2020**.

Skim ini adalah langkah untuk mengawal kenaikan harga barangan keperluan sempena perayaan Tahun Baru Cina yang akan disambut pada 25 Januari 2020 di seluruh negara. **Tempoh kuat kuasa bagi SHMMP Tahun Baru Cina 2020 adalah selama 14 hari iaitu selama 5 hari sebelum perayaan, pada hari perayaan dan 8 hari selepas hari perayaan.** Skim ini akan dilaksanakan di bawah Akta Kawalan Harga dan Antipencatutan 2011.

KPDNHEP telah mengenal pasti sebanyak **16 jenis barangan** bagi pelaksanaan **SHMMP Tahun Baru Cina 2020** berbanding **13 jenis barangan** sebelum ini. **Pertambahan barangan melibatkan cili merah, tomato dan ubi kentang import (China).** Kategori barangan harga terkawal terdiri daripada **ayam, telur ayam, sayuran, barang kering, hasil laut dan daging babi.**

**Kesemua barangan ini mendapat permintaan yang tinggi oleh masyarakat yang menyambut perayaan, oleh itu kawalan harga dibuat ke atas barangan ini bagi menstabilkan harga dan bekalannya di pasaran.**

**Senarai harga** barangan harga terkawal bagi **SHMMP TAHUN BARU CINA 2020** adalah seperti berikut:

- 1) **Ayam hidup**
- 2) **Ayam standard** (disembelih dan dibersihkan berserta kaki, kepala, hati dan hempedal atau mana-mana bahagiannya)
- 3) **Ayam super** (disembelih dan dibersihkan tanpa kaki, kepala, hati dan hempedal)
- 4) **Telur ayam gred A** (berat antara 65.0 gram dan 69.9 gram sebiji)
- 5) **Telur ayam gred B** (berat antara 60.0 gram dan 64.9 gram sebiji)
- 6) **Telur ayam gred C** (berat antara 55.0 gram dan 59.9 gram sebiji)
- 7) **Kubis bulat import** (Indonesia dan China tidak termasuk kubis Beijing)

- 8) **Cili merah**
- 9) **Tomato**
- 10) **Ubi kentang import (China)**
- 11) **Bawang putih (China)**
- 12) **Ikan bawal putih** (berat antara 200 gram hingga 400 gram seekor)
- 13) **Udang putih besar** (berat antara 41 hingga 60 ekor sekilogram)
- 14) **Babi hidup**  
*(\*Harga maksimum di peringkat ladang sahaja)*
- 15) **Daging babi (perut)**
- 16) **Daging babi (daging dan lemak)**

Penentuan harga maksimum pengeluar, borong dan runcit dibuat mengikut kewajaran dan kesesuaian bagi penguatkuasaan kawalan harga yang lebih berkesan untuk memastikan harga yang berpatutan bagi manfaat pengguna dan peniaga.

Kementerian Perdagangan Dalam Negeri dan Hal Ehwal Pengguna menentukan harga maksimum pengeluar, borong dan runcit berdasarkan kepada maklumat harga dari punca-punca berikut:

- i) pemantauan harga di semua daerah di seluruh negara sepanjang tahun 2019 dan pada bulan Januari 2020 berdasarkan kepada pungutan harga yang ditetapkan secara mingguan oleh Kementerian Perdagangan Dalam Negeri dan Hal Ehwal Pengguna;
- ii) pandangan pelbagai agensi Kerajaan yang berkaitan iaitu Jabatan Pertanian Malaysia, Jabatan Perkhidmatan Veterinar (JPV) dan Lembaga Pemasaran Pertanian Persekutuan (FAMA) ; dan
- iii) perbincangan dengan pengeluar, pengimport, pembekal dan pemborong barangan tersebut.

Penentuan harga barangan bagi negeri-negeri dibuat mengikut kesesuaian harga pasaran semasa dan mengambil kira faktor perubahan harga, khususnya bagi barangan import yang dipengaruhi harga di negara asal, perubahan kadar tukaran mata wang dan peningkatan kos utiliti penternak.

Bagi membendung kenaikan harga yang tidak munasabah oleh peniaga yang tidak bertanggungjawab, **tindakan pengeluaran notis di bawah seksyen 21, Akta Kawalan Harga dan Antipencatutan 2011 dilaksanakan** ke atas mana-mana pihak yang didapati menaikkan harga secara mendadak dan ketara.

**Tindakan tegas akan diambil terhadap peniaga yang gagal mematuhi peraturan-peraturan di bawah skim ini.** Mana-mana peniaga yang melakukan kesalahan akan diambil tindakan di bawah Akta Kawalan Harga dan Antipencatutan 2011 dan boleh dikenakan penalti seperti berikut:

- (i) **Kesalahan menjual barangan harga terkawal melebihi harga maksimum:**
  - (a) **Individu;** boleh didenda oleh mahkamah sehingga RM100,000 atau dipenjarakan tidak melebihi tiga tahun atau kedua-duanya atau dikompaun sehingga RM50,000; dan
  - (b) **Syarikat;** boleh didenda sehingga RM500,000 atau dikompaun sehingga RM250,000;
- (ii) **kesalahan gagal meletakkan tanda harga berwarna merah jambu** bagi barangan harga terkawal:
  - (a) **individu;** boleh didenda oleh mahkamah sehingga RM10,000 atau dikompaun sehingga RM5,000; dan
  - (b) **syarikat;** boleh didenda sehingga RM20,000 atau dikompaun sehingga RM10,000.

**Kementerian Pertanian dan Industri Asas Tani** akan membuat pemantauan untuk memastikan bekalan barangan adalah mencukupi dan memastikan harga dipasaran adalah berpatutan. Disamping itu, **Pegawai Penguatkuasa Kementerian Perdagangan Dalam Negeri dan Hal Ehwal Pengguna** akan berada di lokasi-lokasi yang menjadi tumpuan orang ramai membeli-belah seperti pasar awam, pasar tani dan pasaraya untuk menjalankan pemeriksaan dan pemantauan. Langkah-langkah ini mencerminkan usaha berterusan bagi melindungi pengguna daripada aktiviti pengambilan keuntungan yang berlebihan oleh peniaga-peniaga yang tidak beretika semasa musim perayaan.

Kementerian turut memperkukuhkan pemantuan harga dengan mengadakan kerjasama bersama pelbagai pihak, antara lain:

- i) **Pegawai Pemantau Harga** yang menjalankan pemantauan harga barangan keperluan asas di seluruh negara di bawah Kementerian;
- ii) **Rakan KPDNHEP** yang merupakan mata dan telinga Kementerian. Kementerian akan bekerjasama dengan Pengguna yang menyertai program ini bagi menyebarkan maklumat berhubung kepenggunaan terutama mengenai isu harga barang; dan
- iii) **Kerajaan Negeri dan Agensi Kerajaan** lain serta penglibatan **penghulu dan penggawa** dalam membantu memantau dan menyalurkan maklumat kenaikan harga barangan.

Selain itu, Kementerian telah menyediakan pelbagai medium penyaluran aduan bagi memudahkan rakyat mengemukakan aduan berkaitan isu harga. Kementerian turut mewujudkan Skwad Tindakan Aduan Rakyat (STAR) dalam usaha untuk menangani aduan rakyat dengan lebih berkesan.

Peniaga hendaklah mematuhi arahan yang dikenakan dan mengamalkan sikap beretika dalam menguruskan perniagaan manakala pengguna mestilah mengetahui tanggungjawab dan menggunakan hak mereka. Disamping itu, ingin saya ingatkan agar Pengeluar, Pemborong dan Peruncit tidak menaikkan harga secara mendadak selepas berakhirnya pelaksanaan Skim ini. Skim ini akan berjaya sekiranya semua pihak bertanggungjawab dan memainkan peranan masing-masing.

Jika didapati ada peniaga yang tidak mematuhi undang-undang berkenaan dengan skim ini, pengguna boleh menyalurkan aduan kepada Kementerian ini melalui:

- (i) Portal e-aduan.kpdnhep (<https://eaduan.kpdnhep.gov.my>)
- (ii) Call Centre **1800 886 800**
- (iii) Emel : e-aduan@kpdnhep.gov.my
- (iv) Aplikasi telefon pintar **Ez ADU KPDNHEP**
- (v) **Enforcement Command Centre (ECC) 03-8882 6245 / 6088**
- (vi) Talian 03-8000 8000 **Malaysia Government Call Centre (MYGCC)**
- (vii) Whatsapp ke **019- 279 4317**
- (viii) lapor/hadir ke mana-mana 73 buah pejabat KPDNHEP di seluruh negara.

**###**

---

Untuk maklumat lanjut, sila hubungi :-

**ZAMRI BAHAWI**

Seksyen Kawalan Harga dan Anti Pencatutan

KPDNHEP

Tel : 03-88826236

Emel : zamribahawi@kpdnhep.gov.my